

FAOI CHAIBIDIL

Foirseofar an forlónadh ealaíon seo ar nuachtáin

Ghrúpa Meán Bhéal Feirste,
Andersonstown News, North Belfast News agus South
Belfast News, chomh maith le www.nuacht.com



Forlónadh ealaíon in eagar ag Ciarán Ó Pronntaigh

Teagmháil: leabhar@nuacht.com

Cén dochar a dhéanfadh ceann amháin?

Gearrscéal le Ciarán Mac an tSionnaigh

Ní raibh Mícheál riamh tugtha don ól. Bhlais sé deor de leann dubh a athar nuair a bhí sé níos óige, ach diomaite de sin níor bhac sé leis go fírinneach. Bhíodh i gcónaí riamh an-suim aige sa spórt. Peileadóir agus iománaí den chéad scoth ab ea é agus ba mhíne d'úsáideadh sé é sin mar leithscéal leis an deoch a dhiúltú agus é amuigh le cairde.

Bhí a fhios ag a chairde go rí-mhaith gurbh é an spórt an chloch is mó ar a phaidrín ag Mícheál, is mar sin ní chuireadh siad mórán brú air deoch a bheith aige. Dhéanadh sé a sheacht ndícheall i gcónaí chomh maith maidir le cúrsaí scoile – déirigh go han-mhaith leis sna scrúduithe GCSE agus lean sé leis go hArd-Leibhéal. Bhain sé dhá A agus B amach agus leis an fhírinne a dhéanamh, thiofadh leis a rogha rud a dhéanamh as sin amach.

In éadan mhianta a thuismitheoirí, shocraigh sé go nglacfadh sé bliain amach is go rachadh sé a thaisteal thart an domhain. Bhí a fhios aige go maith go dtiocfadh leis pilleadh ar chúrsaí staidéir i gcionn bliana, agus sin an rud a rinne sé go díreach. B'iontach an taithí a thóg sé agus é amuigh ar a thaisteal fud fad na cruinne. Ba mhó a d'fhoghlaim sé ná a d'fhoghlaimodh taobh istigh de léachtlan.

D'fhoghlaim sé faoi chúrsaí an tsaoil agus b'ollmhór a d'fhorbair sé mar dhuine – tháinig sé ar ais le haibíocht is le heagna nach raibh coitianta i mbuachaillí eile ar chomhaois leis.

Shocraigh sé síos arís agus é ar ais i mBéal Feirste. Thosaigh sé ar chúrsa in Ollscoil na Banríona ag déanamh staidéir ar chúrsaí polaitíochta san Eoraip. Bhí sé ag baint an-taitneamh as an chúrsa, agus go fóill féin níor ghéill sé don ól.

Thosaigh sé a shiúl amach le cailín agus bhí ag éirí go han-mhaith leis ó thaobh cúrsaí acadúla de, cé nach raibh sé ach ina chéad bhliain. D'aithin a léachtóirí go raibh gealladh ar leith faoin mhac léinn seo is bhí siad uilig ar aon tuairim go mbeadh todhchaí gheall roimh an fhear óg seo. Agus bhí a thuismitheoirí an-sásta lena leithéid seo a chloisteáil.

Bhí an bhliain anois ag teacht ar ais san aimsir mhaith, ní raibh an samhradh ach thart an coirnéal agus bhí áthas an tsamhraidh le mothú in atmaisféar na cathrach, go háirithe thart ar cheantar na hollscoile.

Ba bheag duine nach raibh aoihb an gháire ar aghaidh acu, bhí gach duine ag siúl thart agus éadaí geala daithe galánta an tsamhraidh orthu. Bhí spraoi agus sult san aer.

Bhí na páirceanna lán le daoine idir óg agus sean, cuid acu le cúpla canna beorach i mála acu. Ar ndóigh, bhí páistí beaga ag rith thart fán áit chomh maith is thiofadh a rá nach raibh na daoine seo ina samplaí maithe dóibh, ach ní raibh siad ag déanamh mórán dochair is bhí an chuid is mó acu sásta glanadh ar shiúl ina ndiaidh.

Bhí Mícheál féin laistigh den halla scrúduithe. Ba é seo an chéad scrúdú aige – an chéad cheann de thriúr. Bhí sé i ndiaidh seachtain mhór staidéir a dhéanamh mar ullmhúchán don scrúdú seo. Déirigh go han-mhaith leis sa scrúdú agus bhí sé an-mhuiníneach as féin.

Chríochnaigh sé thart fá leathuair sula raibh an t-am istigh. Bhí sé cinnte gur chlúdaigh sé gach rud sa scrúdú is nach dtiocfadh leis níos fearr a dhéanamh.

D'amharc sé siar arís is arís ar a raibh os a chomhair. Bhí sé cinnte go raibh grád maith saothraithe aige anseo. Bhí sé ina shuí ansin is thiofadh leis píosa beag den spéir gheallghorm a fheiceáil amach an fhuinneog ag barr an halla. Bhí an ghrian ag scoilteadh na gcloch. Rachadh sé chun na páirce ina dhiaidh seo le sciste bheag a thabhairt dó féin – bhí sé tuillte aige is ní raibh an chéad scrúdú eile ar siúl go ceann seachtaine.

Chuaigh sé chun na páirce le slua cairde i ndiaidh an scrúdaithe. Thug sé leis liathróid a fuair sé ón teach ar a bhealach. Chuaigh an chuid eile acu chun an eisceadúnais ar dtús le deoch bheag, mar a thug siad féin uirthi, a fháil. Bhuail siad uilig lena chéile arís i gcúinne s'acu féin ag cúl na páirce. Lá breá a bhí ann.

Ní raibh cúis imní ar éinne acu anois is ní bheadh go ceann seachtaine. Bhí an ghrian amuigh is bhí siad ag baint ceol as an lá. Chaith cuid acu, Mícheál san áireamh, tamall ag ciceáil na liathróide thart ach bhí sé róthe. Déirigh siad tuisceach is thit siad go talamh, ina luí ansin ag sú isteach na gréine.

Lá te a bhí ann cinnte. Bhí an tart ag teacht ar Mícheál. D'amharc sé thart air féin. Ba bheag duine nach raibh deoch mheisciúil acu. Bhí buidéal mór uisce aige féin, ach ní raibh sé sin ábalta an tart seo a shásamh dó.

Bhí deoch uaidh. Bhí sé ábalta a shamhlú cén dóigh a mblaisfeadh braon fuar beorach ar a theanga ar lá samhraidh mar seo. "Dom canna beorach ansin, a Liam, le do thoil," ar seisean lena chara.

"Sure ní ólann tú, cad a dhéanfadh tusa le canna beorach?" agus Liam ag gáire leis.

"Cén dochar a dhéanfadh ceann amháin?" arsa Mícheál agus thug a chara canna dó.

Bhí an chéad bhlaiseadh sin go díreach mar a shamhladh sé go mbeadh sé. Bhí sé fuar agus fiáin. Séideadh beatha isteach ina bhéal sa chéad bhlaiseadh sin amháin is dá mbeadh cóisir ar siúl istigh ann.

Ní raibh a fhios aige cad a bhí ag teacht air. Bhíodh sé in ann an diabhal deoch seo a sheachaint leis na blianta nuair a bhíodh a chuid cairde ag géilleadh di. Bhíodh seisean i gcónaí níos láidre, ábalta i a dhiúltú.

Ach anois ba chosúil dó gur aimsigh sé an domhan nua rúnda seo. Bhí sé ag cailleadh amach air seo leis na blianta anois agus níor thuig sé cad chuige. Bhíodh sé i gcónaí róbhuartha fá chúrsaí scoile nó faoi chúrsaí spóirt. Ach anois, ní raibh air bheith buartha fá dtaobh de rud ar bith. Ba é seo an faoiseamh a bhí tuillte aige. D'ól sé siar an chéad channa agus d'ól leis, ag coinneáil suas le luas a chairde.

Tháinig an mheisce air sular tháinig sé ar dhuine ar bith eile sa chomhluadar. Bhí sé ag déanamh

rudai amaideacha, ag titim anuas is ag mungailt a chuid cainte. Ba chúis magaidh é i dtosach báire dá chuid cairde, iadsan ag gáire nuair a thitfeadh sé.

Ach níorbh fhada gur éirigh Liam buartha fá dtaobh de. Bhí giota céille aigean go fóill is d'iarr sé air dul abhaile. Ach níor theastaigh sé ó Mícheál dul abhaile, bhí an chraic aige anseo. D'fhan sé agus d'ól níos mó.

Bhí an ghrian ag dul faoi anois agus bhí gach duine súgach. Bhí Mícheál glan ar meisce. Ní thiofadh leis ciall a dhéanamh dá chuid focal. Ní thiofadh leis seasamh fiú mar is ceart. Arís d'iarr Liam ar a chara dul abhaile, bhí sé ag impí air dul abhaile – bhí a sháith ólta aige agus níos mó ar a bharr sin.

Bhí an t-ól ag dul go cloigeann ar Mícheál cinnte anois is déirigh sé feargach leis an fhear seo a bhí ag iarraidh beag a dhéanamh de. "Cé thusa le bheith a rá liomsa go bhfuil mo sháith agam? Imigh leat!" agus bhrúigh sé a chara amach as a bhealach. Thug sé faoi deara go raibh gach duine eile sa chomhluadar dá mhagadh faoin am seo. "Don diabhal libh uilig!" agus d'imigh sé leis, ach níor chun na bhaile a chuaigh sé.

Ba iad siúd na focail dheireanacha a chuala Liam óna dhlúthchara. Bhí aiféala an domhain air nach ndearna sé an méid ba mhó ab fhéidir leis lena chara a chur chun an bhaile slán

sábháilte. Thiofadh leis siúl in éineacht leis le cinntiú go raibh sé ar ais sa teach.

Thiofadh leis gaoch a chur ar a thuismitheoirí. Bhí na smaointe seo uilig ag rith trína chloigeann, ciontach imeachtaí na hoíche sin dá chrá. Ach cén dóigh a mbeadh a fhios aigean go rachadh sé i dtreo na habhann? Cén dóigh a mbeadh sé ag dúil go dtitfeadh a chara isteach san uisce ar an oíche chinniúnach sin.

Anois agus Liam ina shuí san otharlann anseo os comhar a charad, bhí na ceisteanna seo ag troid lena chéile ina inchinn. Níl sa seomra ach é féin, Mícheál ina luí ar an leaba gan chiall gan chéadfaí, agus muintir Mhíchil. Níl le cloisteáil ach bípeanna na n-inneall atá ceangailte dá chara. Is beag a thugann Liam faoi deara fiú nuair a bhristear an ciúnas agus teacht isteach an dochtúra. Ní chloiseann sé go díreach an rud a deir sé le máthair a charad, ach músclaíonn sé de phreab nuair a chloiseann sé scread mhilleteanach thaibhseach na mná boichte seo.

Ní leagfaidh a mac óg, nach bhfuil ach scór bliain aige ar an domhan seo, cos ar thalamh arís. Ní thiofadh focal eile amach as a bhéal go deo na ndeor. Ní bheidh sé ábalta fiú béile a ithe leis féin. Fágadh pairilis air. Cén dochar a dhéanfadh ceann amháin, maise!

